

sta di quanto havea proposto, presa eri sera nel Consejo di X. Et fono con li Cai di X su varii colouqui, et poi dimandò danari per lui, resta aver ducati 6000, fo ordinatò darli; et partirà questa sera.

Noto: fo eri a l'Arsenal, vete certe artellarie, ordinò fusseno mandate in campo; e altre particolarità.

Di campo, fo letere di eri sera, di sier Domenego Contarini provedador zeneral. Come i nimici sono ai soliti alozamenti, e par si fortificavano in Montagnana et Este, ch' è signal non siano per levarsi. *Tamen* in loro campo è assa' amalati, e molti son morti, etc.

In questa matina, in le do Quarantie criminal, con tutti tre li consieri sier Piero Lion, sier Francesco Foscarini et sier Zorzi Pisani dotor e cavalier, compite di parlar sier Alvisè Bembo el XL, qual difende sier Zuan Francesco Miani fo conte a Sibinico; ma ozi, *ut* dirò, non parlò ben. Andò poi in renga sier Sebastian Zustignan el cavalier sinico *olim* in Dalmatia, et giustificò certe opposition li era stà fate *publice* per sier Marco Miani el XL, qu. sier Anzolo, in Quarantia, che l' occultava al Consejo certe scritture, etc. Or venuto zoso, andò la parte che 'l messe di retenirlo et proclamarlo, colegiarlo, etc., *ut in similibus*. Fo 12 non sincere, 10 di no, 47 di si, e fo preso di retenirlo, e fo sacramentà el Consejo di man di Consieri. El qual sier Zuan Francesco tutti questi zorni era in Palazzo aspetando la Quarantia venisse zò; sichè è stà preso di retenir de si *largo iudicio*, etc. Non è più da fidarsi del mondo, e ben si dice: *nolite iudicare secundum faciem*, etc.

Da poi disnar, fo Consejo di X con la zonta per trovar danari. E tra le altre provision, acetono la suplicha dil condutor et dacieri dil dazio di l' ojo, quali perdeteno ducati 6000 l' anno passato, si offeriscono dar a la Signoria ducati 3000 contadi et ducati 3000 imprestar, da scontar da mò anni do in angarie. *Item*, creseteno salario di ducati 60, fino a ducati cento a Lorenzo di Avanzi scrivani a li Governadori, qual dà a la Signoria ducati 500, con questo la mità siano donati e l'altra mità scontai in certi tempi. *Item*, acetono ducati 300 di tre fioli, sier Piero, sier Zacaria e sier Cristofolo Moresini qu. sier Nicolò, quali hanno pocha età, ma quando arano anni 18 habino la prova di 20, et vengino a Consejo, e di 20 habino la prova di 25; et in questi danari si seonta certo eredito hanno di orzi dati a la Signoria. Ed altre parte preseno, *ut in parte*. *Item*, fo dati al capitano zeneral ducati 1600, e poi doman se li darà ducati 2400 a conto dil suo eredito, et cussi li fu mandati a casa.

In questo zorno a San Marco fo expedito quel bandito, che per il Consejo di X fo preso di tajarli la man, dove havia ferito uno a San et poi la testa in mezo le do Colone. Et cussi li fo tajata.

Vene per una nave vien di Cypro con gotoni, patron, con *letere di Cypro et di Soria*. Et prima da Corfù se intese la morte di sier Ambruoso Bragadin di sier Andrea, et per letere di Cypro, di se intese esser morto de li sier Antonio Bon qu. sier Nicolò, era Consier. Et il morbo a Damasco era miorato, *adeo* sier Hironimo di Prioli era partito di l' isola e navegato a Baruto. El resto di marchadanti doveano andar. Grandissima abbondantia di biave era in Cypri, moza di orzi, di formenti ecc., sichè la Signoria potrà haverne stera 150 milia; tanto ne è. Le cavalete non ha fato danno alcuno. È da saper, che questo Lujo fo tratato in Colegio zercha far compreda di formenti, e fo terminato mandarlo a levar in Cypro; et cussi quante nave andono in in Soria de ritorno nolizono a la Signoria a levar formenti; sichè si haverà grande abbondantia questo anno che vien.

Di Soria fo letere, etiam di Damasco. Con avisi del Signor turco, qual andato con l' exercito contra el Sophi, par sia voltato esso Signor turcho, et era zornate do lontan di Alepo. Si tien sia per venir a tuor la Soria. Et par, el signor Soldan li habbi mandato uno armirajo di primi con 1000 cavali per suo ambador con presenti a esso Turcho, el qual non ha voluto aldir nè acetar li presenti, dicendo non aceta robe robade. *Item*, scrive la morte di do marchadanti nostri in Alepo da peste, sier Octavian Bon qu. sier Domenego et sier Francesco Foscarini di sier Andrea. *Item*, do fioli di sier Batista Moresini aveano auto la peste, et erano variti. Et altre particolarità *ut in litteris*, sicome *diffuse* scriverò il sumario tutto di ditte nove.

Et di Alexandria fo etiam aviso. Como el signor Soldan havia mandato uno armirajo di Alexandria chiamato a la sua armada, qual era al di galie 20 et 4 fuste, et vol far altre 10 galie, et li era venuto homeni e coriedi e fermenta da Constantinopoli.

A dì 17, Domenega. Il Principe justa il solito 36* non fo in Colegio. El capitano zeneral parti eri sera per tornar in campo. E col Senato si expedirà poi doman a quanto ha proposto, zercha haver alozamento per questa invernata al nostro exercito. *Item*, il capitano di le galie di Baruto parti sta note per l' Istria, poi partirà la segunda galia, e vanno molte galie.